

L Ö G

um tilbúning og verzlun með ópíum o. fl.

FORSETI ÍSLANDS

gjörir kunnugt: Að ég samkvæmt 4. gr. laga nr. 25 18. apríl 1970 um breyting á lögum um tilbúning og verzlun með ópíum o. fl. nr. 14 20. júní 1923 hef látið fella meginmál þeirra ásamt meginmáli laga nr. 43 2. maí 1968 inn í lög nr. 14 20. júní 1923 um tilbúning og verzlun með ópíum o. fl. og gef þau út svo breytt.

1. gr.

Bannaður er tilbúningur, innflutningur og útflutningur á unnu ópíum og verzlun með það.

Undir bann þetta falla og ópíumsleifar allar og hvers kyns afgangur, einnig það, sem eftir verður þegar ópíum er reykt.

2. gr.

Lyfsölum er heimilt að búa til og vinna úr, flytja inn og út og verzla með óunnið ópíum og ópíum til lækninga, morfín, kókain og heróín, svo og hvers konar efnisblöndun, sem í er meira en $\frac{1}{5}\%$ af morfín eða meira en $\frac{1}{40}\%$ af heróín og kókain. Dómsmálaráðuneytið semur nánari reglur um afhendingu lækna á umgetnum lyfjum. Áfengisverzlun ríkisins er heimilt að útvega læknum lyf þessi frá útlöndum, svo sem önnur lyf.

Dómsmálaráðuneytið setur nánari ákvæði um tilbúning og úrvinnslu, inn- og útflutning, svo og verzlun og afhendingu á nefndum efnum, og setur reglur um eftirlit með slíkri iðju og verzlun.

3. gr.

Unnið og óunnið ópíum, ópíum til læknislyfja, morfín, kókain og heróín ber að skilja í lögum þessum samkvæmt skilgreiningum alþjóðaópíumfundar 23. janúar 1912.

4. gr.

Dómsmálaráðuneytið getur úrskurðað, að ákvæði laga þessara gildi um öll efni, hvort sem þau eru afleidd af morfíni, kókaini eða söltum þeirra eða ekki, enda hafi sannazt við vísindalega rannsókn, að misnota megi þau á líkan hátt, eða að þau hafi lík skaðvænleg áhrif sem efni þau, sem nefnd eru í 2. gr.

5. gr.

Óheimilt er að hafa undir höndum eða varðveita, veita viðtöku, gefa, afhenda, selja eða verzla með hvers konar lyf og efni, er ákvæði laga þessara taka til og ólöglega eru flutt inn eða framleidd. Gera skal upptæka til ríkissjóðs slíka vöru og hagnað af verzlun með hana.

6. gr.

Brot á lögum þessum og reglum settum samkvæmt þeim varða sektum allt að 1 milljón króna eða varðhaldi og fangelsi allt að 6 árum, ef um stórfellt brot er að ræða. Það telst stórfellt brot, ef lyfjum þeim eða efnum, sem undir löggin falla og ólöglega eru flutt inn eða framleidd, er dreift til margra manna eða þau seld gegn

verulegu gjaldi, eða ef um er að ræða innflutning, útflutning, vörzlu, verzlun, mót-töku, afhendingu, framleiðslu eða vinnslu þessara lyfja eða efna í því skyni að selja þau, eða dreifa þeim til margra manna eða gegn verulegu gjaldi með öðrum hætti en lög þessi eða lyfsöluglög heimila.

Með mál út af brotum á lögum þessum skal fara að hætti opinberra mála.

Gjört í Reykjavík, 16. júní 1970.

Kristján Eldjárn.

(L. S.)

Jóhann Hafstein.

L Ö G

um lífeyrissjóð sjómanna.

FORSETI ÍSLANDS

gjörir kunnugt: Að ég samkvæmt 2. mgr. 13. gr. laga nr. 59 12. maí 1970 um breyting á lögum nr. 78 28. apríl 1962, um lífeyrissjóð togarasjómannanna og undirmanna á farskipum hef látið fella meginmál hinna fyrrnefndu laga nr. 59/1970 inn í lög nr. 78 28. apríl 1962 og gef þau út svo breytt:

1. gr.

Sjóðurinn nefnist Lífeyrissjóður sjómanna og starfar með því skipulagi og markmiði, sem segir í lögum þessum. Heimili hans og varnarþing er í Reykjavík.

2. gr.

Sjóðfélagar eru þeir nefndir í lögum þessum, er skylt er að greiða iðgjöld til sjóðsins og rétt eiga á lífeyri úr honum.

3. gr.

Sjóðfélagar eru allir þeir, sem lögskráðir eru á íslenska togara, íslensk farskip, sem notuð eru til farþegaflutninga eða vöruflutninga, og á íslensk varðskip, nema yfirmenn á farskipum, sem tryggðir skulu í lífeyrissjóðum, sem skipafélögin eru aðilar að. Yfirmenn strandferðaskipa ríkissjóðs og varðskipanna skulu tryggðir í lífeyrissjóði starfsmanna ríkisins. Heimilt er þó útgerð farskipa að tryggja yfirmönnum lífeyrissjóðsréttindi í sjóði þessum, ef samkomulag næst um það við stéttarfélög yfirmanna.

Sjóðfélagar eru enn fremur þeir sjómenn og beitingamenn, sem lögskráðir eru á íslensk vélskip 12 lesta eða stærri, er stunda veiðar með línu, netum, botnvörpu, dragnót, humarvörpu, þorskveiðar með hringnót, lúðuveiðar með línu, síld- og loðnuveiðar, svo og aðrar veiðar, ef í samningum milli félaga sjómanna og útvegsmanna eru ákvæði um lífeyrissjóðsréttindi frá 1. janúar 1970 eða síðar. Sama gildir ef slík skip eru notuð til flutninga innanlands, flutninga á ísvörðum fiski eða verið er að flytja þau milli landa eða milli staða innanlands. Undanþágu frá þátttöku samkvæmt þessari málsgrein skal þá veita fyrstu 4 mánuðina, sem viðkomandi starfsmaður er hjá sömu útgerð, enda leggi hann fyrir skráningarstjóra skriflega beiðni um slíka undanþágu og eigi ekki réttindi í sjóðnum vegna fyrra tíma-